



ル 5
3150
11



門 儿 5
號 3150
卷 11

黔南識略卷十六

思南府

貴州巡撫長白愛必達撰

思南府在省城東北六百四十里禹貢荊州荒裔秦屬黔中郡漢屬武陵郡三國吳黔陽縣地晉陷蠻夷後周得其地未為郡縣隋初屬清江郡開皇十九年置婺川縣屬庸州唐武德四年置務州領婺川涪川扶陽三縣貞觀四年改務州為思州以界內思邛水為名天寶元年改為甯夷郡乾元元年復為思州五代後廢宋政和八年番部田祐恭內附仍置思州領

昭和十四年
六月廿八日
藏本

黑石田卷一
一
婺川邛水安夷三縣宣和四年廢州爲城及婺川縣以婺川城爲名邛水安夷二縣皆作堡竝潁黔州紹興元年復爲思州屬夔州路元年置思州軍民安撫司改授宣慰司屬湖廣行省明洪武四年改屬四川六年思南宣慰使田仁智思州宣撫使田仁後歸附析爲二宣慰仍屬湖廣永樂十二年田氏兩宣慰廢遂分其地爲思州鎮遠思南石阡黎平新化銅仁烏羅八府設布政司統轄之思南自唐永隆中已爲田氏據歷八百餘年始爲內地隆慶四年徙治平溪衛尋復故

國朝因之領縣三安化婺川印江轄貴東道設知府一教授一訓導一經歷一其境東至銅仁府界七十里西至遵義府界三百四十五里南至石阡府界七十里北至四川彭水縣界五百東南至銅仁府界一百八十里西南至鎮遠府界五十五里東北至四川西陽州平茶司界三百七十里西北至鎮遠縣界二百一十五里廣四百里袤五百六十里至京師七千三百九十五里襟帶川蜀控扼黔楚山谿連亘水陸要區城周四里六分計七百七十丈高一丈五尺甃以石門五嘉靖二十八年建城之內爲中

和山俯瞰江流爲郡大觀萬勝山在城東一里下臨德江高數千仞四面陡絕下有龍洞泉灌田千畝元末紅巾之亂郡人避兵於此思唐山在城東四里寰宇記思唐山南連何只水北枕內江水是也天馬山在城南二里下有翔陽洞三臺山在城南五里左有開仙洞下有風神洞禱雨輒應巖門山在城西二里兩山對立峰嶠峭峻左曰天巖門右曰小巖門官道經其中永勝武勝二關依巖而設郡之門戶也嵇公山在城西三里昔有嵇道人廬其上仙去下有嵇公泉萬聖山在城西南三百里四面陡絕上平坦可耕

琴德山在城西二十五里洞壑最勝魄巖山在城北二百里高百丈許延袤二十里接西陽界金竹山在城西二百里蒲竹山在城北二百里石馬山在城北二百八十里中有紫洞九老峯在城北一里九峯環列高巖峯在沿河司又有碑摸巖高數十丈上有仙書紅字又有仙巖數處皆有古篆書明嘉靖間西陽司來侵地界募人鏟去仙人洞在城南三十里石芝洞在城西四里明副使徐九皋刻有石芝洞天四字藏春洞在城西六里洞不甚深廣而奇石蒼潤花木掩映爲郡之勝境相近又有迎春洞鐘鼓洞其江曰

水德江卽烏江也自石阡府入府界逕城西有鯉魚峽峽長十里湍流灣谿上有竇若魚口然又逕香爐灘下爲白鷺洲又北三十里歷獅吼洞有泉下瀉十餘丈激流怒吼兩石排立俗呼爲鯉魚朝天洞下爲湖底灘商旅皆於此易舟而下又北三百里爲龔灘濤湧波喧迤十餘里惟輕舟始得濟又北歷袁灘入卅川彭水縣界又北至涪州城東北銅柱灘入岷江謂之涪陵江其水南導武陵郡昔司馬錯泝舟此水取楚黔中地范成大吳船錄過涪州入黔江大江水色黃濁黔江乃清冷如玻璃其下悉是石底自成都

發舟至此始見清江是也上費溪在城東北百里後周宣政元年以此水名郡北流入四川黔江縣界曰黔江東北入湖北施州界曰清江方輿勝覽云黔江自思州卽今思南之上費溪發源經五十八節名灘至黔州境分流入黔江縣界爲施州江入湖廣施州衛謂之清江明史地理志清江合施州衛境諸水下流至宣都縣入於大江水經注夷水卽狼山清江也水色清照十丈分沙石蜀人見其澄清因名清江也蓋卽是水下流矣河由江在沿河司源出銅仁之烏羅司下流入水德江亂石橫江水勢最險司北五里

爲五門灘其下爲湖白灘以水色白因名又十里爲
黎灘最爲峻險又有涪灘松灘野猪虎口諸灘皆江
流所經也石馬江在沿河司西下流合於德江亭子
溪在沿河司自龍岡中流出又北七里有後溪自馬
鬃嶺流出俱入河由江又有甫南溪鶯溪北竹溪在
朗溪司一日三潮又名三潮溪居民引水以溉田暮
溪在城東三里昔樂溪在城東十里憲溪在城南五
里掌溪在城南二十里青鸞溪在城西三十里俗稱
黑鶯溪鸚鵡溪在城北三十里俱滙於德江馬公泉
在城南十二里俗稱白水泉靈泉在朗溪司東北水

從石底湧出不消不長珍珠泉在沿溪司南亦名溫
泉黃魚泉在城北五里產魚皆黃色綠井在朗溪司
嘗有綠鳩羣浴其中楊柳井在城北山麓泉甚清中
有赤碧色小蛇遇大旱出卽雨郡地鄰楚蜀寒暑較
正田畝東南二鄉多水田西北二鄉多旱田其餘皆
依山附麓層疊如階梯但有泉源引溉者卽爲膏腴
現在成熟田三萬七千五百二十一畝額徵正銀四
千二十七兩有奇改徵米一千二百四十六石有奇
府倉貯穀二萬二千七百五十六石有奇道光五年
新建義倉一十四間共貯穀一千四百石有奇產米

僅敷民食不至仰給鄰封學額歲科試皆二十名歲試武生亦如之嘉慶十三年建鳳岡書院於遵化門內膏火之需皆郡守捐置義學五所舊有學田歲收穀三十二石場市有八樹則青桐楓香菓有棗梨桃李蒲溪鉛廠久經封閉稅口一額徵鹽稅正羨銀共二千一百二十兩有奇漢莊一百九十一處轄三土司在城者爲隨府辦事司宋時田二鳳以功授沿邊溪洞軍民宣撫司明洪武五年改授思南宣慰司永樂十一年改授隨府辦事長官司蠻夷長官司明洪武十年授土人安輝今世守在鄉者沿河祐溪長官

司明洪武十年以張文龍爲長官冉永安副之朗溪蠻夷長官司明洪武十年以田榮爲長官任鑑副之屬思南宣慰司永樂十二年屬烏羅府正統三年府廢來屬今竝承襲惟辦事蠻夷二司有印設四汛十八塘城中駐劄思南營遊擊一員守備一員把總四員外委一員額外外委二員兵四百十名分防印江汛千總一員外委一員兵一百十名婺川汛千總一員外委一員兵一百十名在城兵一百十名府城兵糧於秋收米內支給不敷之數赴糧道領銀購買四至皆僻徑惟出得勝關歷石阡而

至施秉爲赴省孔道城外德江舟楫通行販蜀鹽者
多取道於此餘與他府同

論曰明御史田秋疏稱思南界連川省流民爲患請
設道員以鎮撫之其作思南志序云官於此者率嘿
嘿不得志日夕望代是思南在前明時疲難瘠苦守
土者恒鬱鬱不願久居也何與今日之思南大相逕
庭耶然其接壤巴蜀之區俗獷民頑度亦猶費整飭
也黔省疆理犬牙相錯有距城里餘卽爲他屬所轄
者有遠隔五六百里轉爲本屬所轄者洞深箐密緝
捕爲難說者謂他省弭盜之法宜於保甲黔省宜於

險要處所多立碉卡而每鄉所設鄉約尤爲緊要鄉
約不必盡皆善類其經管場市村寨皆其日歷而夕
游不逞之民倚以爲重故鄉約者能吏則用爲線以
捕盜者也懦吏則用之爲蠹以滋盜者也嚴其貴成
厚其賞賚風聲樹而奸民息此非存乎在上者哉

安化縣

安化縣附郭隋務川縣地唐置思州治務川縣又置
思王縣五代時廢爲務川縣地元置水德江長官司
又置安化上中下蠻長官司屬思州安撫司明洪武
初改水德江長官司屬思南宣慰司永樂十二年屬

府萬歷三十三年改置安化縣設治府南門外

國朝因之其境東至印江縣界三十里西至石阡府龍泉縣界一百四十里南至銅仁府界一百四十里北至婺川縣界一百一十里東南至四川酉陽州界一百五十里西南至石阡府界六十里東北至銅仁府界一百三十里西北至四川彭水縣界二百五十里形勢水道已詳府記惟費水實發源於貴州而諸水之合費水入江者皆已在四川境內故黔中向未著錄而其源實在思南府城東北百里舊費州以此得名北流入四川黔江縣合延水入江東北又至湖北

宜都縣入江通典及太平寰宇記竝云後周置費州因水爲名費水今名上費溪至夔州府以下名夷水亦曰清江考黔江在思南東北夔州又在黔江東北費水正流自黔江合大江後其支流又至夔境爲夷水耳漢時思南等處尚陷武陵蠻中地志各書只從其所見言之故未及從流溯源梳剔幽隱齊召南水道提綱亦止言清江發源施南府西北境尚不知實出貴州也思王廢縣在城西南三百里思王山下涪川廢縣在城東北百里扶歡廢縣在城西南五十里扶歡山下多田廢縣在城西北四十五里扶陽廢縣

在城西北八十五里城樂廢縣在城西北一百五十里唐武德四年築城時人歌舞之故四城樂祥柯廢縣新興廢縣在城西廢貴州在城東北廢充州矩州莊州應州溱州明州皆在縣境甌脫之地遷徙不一此其明徵矣田畝則煎茶溪來安營等處山高畏旱沿江一帶又時有水患現在成熟田三萬八千七十一畝有奇不徵米額徵條編輕賣馬館攤丁鹽鈔蠟價等銀二千二百二十五兩有奇各案存倉實貯穀一萬一千六百石有奇社穀一百一十三石貯城倉官爲經理所產稻穀無多全賴雜糧接濟學額歲科

文生十二名歲試武生亦如之義學三嘉慶十二年建設有言是堂爲書院場市十八各有定期山頭地角遍栽桐椴杉漆冬青等樹桐椴摘子取油冬青放蟲取蠟民稍獲利漆樹倍於他產夏秋之間商賈輻輳土性不育蠶無鉛銅礦廠亦無稅課縣境均係漢莊四十八溪舊有黑苗十寨計一千五十餘戶銅仁軍需後存者僅四百餘戶現皆薙髮衣冠言語與漢民略同轄土縣丞一土主簿一皆住縣屬土巡檢一員遠處龍泉縣地方明洪武初張乾福以功授水德江長官司永樂十八年以楊潮海爲副長官又洪武

七年陸公閱以功授土巡檢萬歷三十年正長官張
溶無嗣族人爭襲久未決改爲縣以正長官改授土
縣丞副長官改授土主簿及原設土巡檢俱領於縣
襲至今俱無印嘉慶二年新設苗千總一員把總一
員外委一員住六堡轄苗兵十名額餉赴藩庫請領
無驛遞塘頭河建有石橋名上善橋大河上下均有
渡船北越婺川縣城有發科壩紅絲塘等處土名下
五里爲縣所屬俗頗刁悍餘竝詳見府記

婺川縣

婺川縣在府治西二百四十里省城東北八百八十

里漢酉陽縣地隋開皇十九年置務川縣屬庸州大
業二年廢庸州以縣屬巴東郡唐武德四年招慰使
冉安昌以務川當牂柯要路須置郡以撫之於縣治
置務州貞觀八年改爲思州宋宣和四年廢爲務川
堡隸黔州紹興初復爲縣屬思州元改務川縣屬思
州軍民安撫司因婺星飛流化石改務爲婺明洪武
五年屬鎮遠州十七年後仍屬思州永樂十二年仍
屬思州

國朝因之其境東至安化屬橋邊場五十里西至湄潭
屬黃都堪六十里南至安化屬天半寺八十五里至

興南諸山卷之六
龍泉屬受水一百一十六里北至九杵坎彭水印江
婺川三縣交界處二百里東南至府屬墮坪場七十
五里西南至龍泉屬九杵關七十五里東北至安化
屬落車一百二十里至印江屬焦窩壩一百七十里
西北至正安州屬長灘河五十里東西相距一百五
十餘里南北相距五百餘里城周三里三分甃以石
門四萬歷二十二年建多羅山在城西四里相接有
馬鞍山安峯山在城北相近有筆架山華蓋山在城
西十里峯巒高大林木深邃爲前代避兵處或云卽
無黨山也以四面懸絕而名潛山在城二十五里產

硃砂巖前山在城東北二十里長錢山在城東北五
十里縣舊有板場坑水銀場稅課局蓋置於此成化
九年廢泥塘山在城南五十里產硃砂卧龍山在城
北五十里大巖山在城東八十里有巖屋頗深廣容
百餘人木悠峯在城東四十里上有水月宮產硃砂
鳳凰峯在城東五十里萬卷巖在城西五里石累萬
層儼如卷帙小軍巖在城西五里地名熊林巖金藏
巖在城西五十里地名祥川巖上有鹿林鴉池大巖
門在城東二里有石壁立故名夢子坡在城北七十
里坡頂平廣上有石爐高約數丈雲巖洞在城東一

黔南諸山卷一
里中寬可容百人外有石柱石几蟠龍洞在城南一
里石壁鑄有蟠龍化雨四字金牛洞在城南二十里
地名牛塘山洞內有石如牛豐樂河在城東五十里
其水由龍泉湄潭折入縣境至洪渡入龔灘北滙蜀
江河只水在城東十里羅多水在城東八十里其流
合於豐樂河寰宇記何只羅多者獠之姓名倒羊江
在城北五里一名曉羊江源出華蓋山至隘雞渡滙
豐樂河洪渡河源出龍泉縣北境逕縣境得煎茶溪
水於龍河注焉洪亮吉水道攷云按寰宇記黔州洪
杜縣唐武德二年置以縣東洪杜山得名貞觀三年

又北移於洪杜溪今攷洪杜廢縣距此不遠則此河
當卽昔之洪杜溪以音同而轉耳舊唐書亦云洪杜
縣治洪杜溪麟德二年治龔湍卽龔灘也龍泉在城
東二十里其泉一日三潮消則澄清長則混濁居人
資以灌溉香墨池在城西三十里其水清香汲以注
硯良佳暖塘在城北五里水至冬尤暖魚皆聚焉來
雁塘在城東北三十里田畝東南二鄉爲膏腴西北
二鄉爲磽瘠現在成熟田一萬九千六百九十九畝
有奇額徵正銀一千四百六十六兩有奇縣倉貯穀
一萬一千九百五十八石有奇社倉穀二十一石有

黔南諸州卷一
奇分貯城鄉由鄉約經管兵糧於思南營折銀發給
產米不多有包穀雜糧等項足敷民食無須他處接
濟惟川民流寓者多彼中稍歉輒攜家就食於黔由
縣至郡所在多有其愿者爲人傭耕力足自給黠者
則不免作奸行竊散處村寨防範尤宜密焉縣之稱
繁亦以此學額八名歲試武生亦如之義學一場市
二十二各有定期四境皆叢山密箐鮮有平疇多植
青桐桐茶漆樹而漆之利更廣四鄉所出歲不下數
萬金農民全賴以資生東北江邊等處木棉所出亦
不下千金東南山高風冷育蠶非宜西北與正安州

接壤處地底氣暖種橡育蠶俱有成效大巖山何家
洞向有水銀硃砂廠近已封閉濯水關有稅口額徵
鹽稅銀九百一十五兩有奇通屬漢莊七十有九無
苗寨亦無土司設一汛十塘城中駐劄思南營分撥
千總一員外委一員把總一員兵十名分撥各塘
兵二十各城存兵十名無驛遞境聯楚蜀南北
通衢由濯水關歷江口鎮爲入川孔道由豐樂河分
路歷龍泉湄潭而至開州爲進省捷徑豐樂河倒羊
河隘溪柳塘四渡各設渡船餘與各縣同
印江縣

印江縣在府治南四十里省城東北六百餘里唐開元四年分婺川地置思州縣屬思州後廢宋政和八年置印水縣宣和中廢爲堡屬黔州紹興初復置縣隸思州元置思印江等處長官司屬思州軍民長官司明洪武初隸思南宣慰司永樂十二年屬府宏治七年改置印江縣

國朝因之其境東至府屬朗溪司界十五里西至安化縣界四十五里南至銅仁府界四十里西南至安化縣界六十里東北至四川平伐司界八十里西北至府屬蠻夷司界七十六里廣袤六百五十里城周七

里三分發以石門五明崇貞十三年建峩林山在城東三里亘二十里層巖疊翠宛如屏幃十種山在城南三里河縫山在城西十里俗稱觀音巖最高可三十丈上有石龕下有石碕甚深去里許有石形垂如肺土人呼爲金石肺大聖登山在城北十里高聳爲縣境之望頂平濶三里許昔建鍊瓦寺於上後廢每冬雪深數尺入夏始解又呼大石墩石可琢盃皿名爲黑玉其麓有葉魚碕石笋山在城北五里又有銅鼓山亦名花巖有石壁立扣之其聲如鼓白水坡在城南五里衆山夾擁每春水四溢咸滙於此壁懸瀑布

里人常以瀑流有無規歲豐歉滴水硿在城西五里
水滴石竇中清越如琴聲思邕江在城南源出府屬
朗溪司北流入水德江後訛邛爲印遂以名縣桶溪
在城北二里網陀溪在城北二十里皆合思邕江關
曰峩林曰七星曰秀寶曰樂茂均爲險要田畝山高
水陡地土瘠薄近城平坦處水旱無虞寨凱一帶畏
水落木一帶畏旱現在成熟田一萬五千七百六畝
有奇額徵正銀一千四百九十七兩有奇不徵米縣
倉實貯穀一萬四千四百石有奇社穀一百四十一
石廩餼赴府倉支領產米僅敷民食學額歲科皆八

名歲試武生亦如之舊設義學後改建依仁書院場
市六各有定期多白楊青桐桐蠟之屬無銅鉛礦廠
亦無稅課通屬材落零星依山傍水並無苗寨轄土
縣丞一員元時張恢以功授亞中大夫世有其地明
洪武五年改授印江長官司宏治七年長官張鶴齡
廢改授土縣丞今承襲無印設一汛八塘城中駐劄
思南營分撥千總一員外委一員兵七十名兵糧
請銀採買按月支發分防各塘兵一十三名無驛遞
渡口由本府石阡而出施秉爲赴省大道東入楚西
入川徑路崎嶇行旅罕至水多淺灘不通舟楫惟城

黔南識略卷十六
南龍津湍流略瀦可以捕魚餘與各縣同

黔南識略卷十六終

